

## RESOLUCIÓN DA XERENCIA DO CONSORCIO GALEGO DE SERVIZOS DE IGUALDADE E BENESTAR POLA QUE SE ANUNCIA O PRAZO DE RESERVA DE PRAZA, PREINSCRICIÓN DE NOVO INGRESO E MATRÍCULA DE USUARIOS/AS DAS ESCOLAS INFANTÍS

A Lei 13/2008, do 3 de decembro, de servizos sociais, inclúe, no seu artigo 3º.e), como un dos obxectivos do sistema galego de servizos sociais, proporcionar oportunidades e recursos que garantan a igualdade entre mulleres e homes e posibiliten a conciliación entre a vida persoal, familiar e laboral e, no artigo 3º.i), garantir o apoio ás familias como marco de referencia no que se desenvolven as persoas.

O Consorcio ten como misión primordial a participación na dirección, avaliación e control da xestión dos servizos sociais de ámbito local, con especial atención na xestión integral das escolas infantís e na atención educativa e asistencial aos nenos e nenas menores de tres anos na forma de recursos, equipamentos, proxectos, programas e prestacións, e no ámbito territorial dos municipios que o compoñen, co obxecto de garantir o acceso de todos os galegos e galegas a uns servizos sociais públicos de calidade, a través dunha oferta de recursos suficiente e equilibrada territorialmente, que contribúa a reforzar a igualdade de oportunidades na utilización da rede social de atención, segundo o disposto no artigo 6 dos estatutos do Consorcio Galego de Servizos de Igualdade e Benestar.

Conforme o exposto,

### RESOLVO

#### Artigo 1. Obxecto

A presente resolución ten por obxecto regular o procedemento de adxudicación de prazas nas escolas infantís 0-3 xestionadas polo Consorcio Galego de Servizos de Igualdade e Benestar e integradas na Rede de Escolas Infantís de Galicia “A Galiña Azul” para o curso 2012/2013.

A relación das escolas infantís xestionadas polo Consorcio xunto cos seus enderezos publicarase nas páxinas web <http://www.igualdadebenestar.org> e <http://www.escolasinfantis.net>.

#### Artigo 2. Requisitos para ser adxudicatario/a.

Serán requisitos imprescindibles para ser adxudicatario/a de prazas nas escolas infantís 0-3 xestionadas polo Consorcio:

1. Que a crianza estea nada no momento da presentación da solicitude
2. Que teña unha idade mínima de tres meses no momento do ingreso
3. Que non teña cumpridos os tres anos de idade ao 31 de decembro de 2012.

Non obstante, poderá eximirse do límite de idade dos 3 anos ás nenas e aos nenos con necesidades específicas de apoio educativo, despois da emisión do ditame do equipo de orientación específica da Xefatura Territorial da Consellería de Cultura, Educación e Ordenación Universitaria correspondente, a petición das/os nais/pais, titores/as legais ou acolledores/as e a través da escola onde soliciten a praza.

### Artigo 3. Criterios de prioridade para a adxudicación das prazas

As prazas vacantes nas Escolas Infantís xestionadas polo Consorcio adxudicaranse de conformidade co previsto no artigo 14.2. do Regulamento de réxime interior.

### Artigo 4. Horario e calendario das escolas.

#### 1. Horario:

O horario das escolas infantís xestionadas polo Consorcio será o establecido no artigo 25.4 do Regulamento de réxime interior.

#### 2. Calendario

As escolas permanecerán abertas de luns a venres, excluídos os días considerados festivos no calendario laboral e os días 3 e 4 de setembro e 24 e 31 de decembro.

O curso dará comezo o día mércores 5 de setembro.

### Artigo 5. Solicitudes e documentación.

#### 1. As/os interesadas/os poderán solicitar praza a través do modelo normalizado recollido nesta resolución:

##### a) Reserva de praza

Para a reserva de praza as/os interesadas/os presentarán a solicitude segundo o modelo oficial Anexo I desta resolución, sinalando a casíña correspondente.

##### b) Novo ingreso

Para as solicitudes de novo ingreso presentase o modelo oficial segundo o Anexo I desta resolución, sinalando a casíña correspondente. Poderase solicitar praza para máis dunha escola indicando a orde de preferencia, naqueles concellos onde exista máis dunha escola. O Consorcio non estará vinculado polos criterios de preferencia sinalados na solicitude.

As/os interesadas/os en participar nas prazas de escolas infantís 0-3 conveniadas coa Consellería de Traballo e Benestar a través do programa Cheque infantil, dirixido a aquelas/es solicitantes que non obteñan praza en ningunha das escolas solicitadas, deberán cubrir o apartado correspondente no Anexo I desta resolución.

As/os solicitantes de novo ingreso deberán cumprimentar o Anexo II e achegar á solicitude a documentación que corresponda a súa situación.

Así mesmo, cando non se tivese presentado a declaración da renda, o solicitante marcará a casíña no apartado correspondente do anexo I, autorizando coa súa sinatura que o Consorcio solicite a información da Axencia Estatal de Administración Tributaria en relación ao cumprimento das súas obrigas tributarias estatais. Para o suposto de que o outro/a proxenitor/a, titor/a ou representante legal estivese nas mesmas circunstancias asinará a autorización que conta no Anexo III.

Os impresos facilitaranse nos propios centros nos que se solicite praza e nos enderezos electrónicos <http://www.igualdadebenestar.org> e <http://www.escolasinfatis.net>.

## Artigo 6. Lugar e prazo de presentación das solicitudes.

1. As solicitudes coa documentación requirida presentaranse na escola para a que se solicita a praza.
2. No suposto de reserva de praza no que se solicite unha escola distinta a aquela na que estea matriculada a crianza, a solicitude presentaranse nesta escola, indicando o centro para o que solicita a reserva de praza. Isto será de aplicación cando se trate de escolas nun mesmo concello, de conformidade co previsto no artigo 14.2 A).

O anterior será de aplicación sen prexuízo do disposto no artigo 38.4º da Lei 30/1992, do 26 de novembro, de réxime xurídico das administracións públicas e do procedemento administrativo común (BOE núm. 285, do 27 de novembro) modificado pola Lei 4/1999, do 13 de xaneiro (BOE núm. 16, do 19 de xaneiro e BOE núm. 30, do 4 de febreiro), en adiante LRX-PAC.

O prazo para a presentación das solicitudes tanto de reserva de praza como de novo ingreso será dende o día 1 ao 31 de marzo, ambos os dous incluídos.

## Artigo 7. Tramitación e avaliación das solicitudes. Publicación das listaxes provisionais e definitivas.

Na tramitación das solicitudes estarase ao previsto nos artigos 15 e 17 do Regulamento de Réxime Interior.

A relación provisional de admitidas/os e lista de agarda, coa puntuación obtida, farase pública o día 11 de maio e poderase consultar na escola infantil, así como nas páxinas web <http://www.igualdadebenestar.org> e <http://www.escolasinfantis.net>.

As/os solicitantes poderán efectuar as reclamacións que consideren oportunas no prazo dos dez días naturais posteriores á data da exposición pública da relación provisional, que abranguerá desde o día 12 ao día 21 de maio ambos os dous incluídos.

Estas reclamacións entenderanse resoltas coa publicación da lista definitiva.

## Artigo 8. Relación definitiva de adxudicatarias/os de praza.

1. A relación definitiva coa puntuación poderase consultar desde o día 11 de xuño nas escolas infantís así como nas páxinas web <http://www.igualdadebenestar.org> e <http://www.escolasinfantis.net>.
2. Contra esta resolución, que no esgota a vía administrativa, poderá interpoñerse recurso de alzada ante a Presidencia do Consorcio Galego de Servizos de Igualdade e Benestar, no prazo dun mes desde o día seguinte ao da publicación da resolución da Xerencia do Consorcio pola que se fan públicas as listas definitivas de persoas admitidas e de agarda nas páxinas web <http://www.igualdadebenestar.org> e <http://www.escolasinfantis.net>.
3. As/os solicitantes admitidas/os disporán dende o día 12 ata o día 30 de xuño, ambos os dous incluídos, para matricularse presentando no centro onde obtivesen praza o impreso de matrícula debidamente cuberto xunto coa documentación prevista no artigo 19 do RRI.

O impreso de matrícula facilitarase nos propios centros, así como nas páxinas web <http://www.igualdadebenestar.org> e <http://www.escolasinfantis.net>.

4. A formalización da matrícula no prazo sinalado é imprescindible para confirmar a praza. Se non se realiza a matrícula da/o nena/o no prazo sinalado, considérase decaída/o na súa solicitude.

Artigo 9. Listaxe de agarda e cobertura das prazas vacantes.

Na xestión da listaxe de agarda e cobertura das prazas vacantes estarase ao previsto no artigo 21 do RRI.

Artigo 10. Prezos públicos

Para o curso escolar 2012/2013 será de aplicación o Decreto 49/2012, do 19 de xaneiro, polo que se aproba o réxime de prezos das escolas infantís 0-3 dependentes da Consellería de Traballo e Benestar.

Disposición Derradeira

A presente resolución entrará en vigor o día seguinte o da publicación do anuncio no Diario Oficial de Galicia polo que se fai pública a resolución da Xerencia do Consorcio Galego de Servizos de Igualdade e Benestar pola que se anuncia o prazo de reserva de praza, preinscrición de novo ingreso e matrícula das Escolas Infantís xestionadas polo Consorcio.

Santiago de Compostela, a 8 de febreiro de 2012

O xerente do Consorcio Galego de  
Servizos de Igualdade e Benestar



Roberto Rodríguez Martínez